



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՐԴ

ք. Երևան

10.11.2016թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

ՍՑ-68/16

ՀՀ գնումների բողոքարկման խորհրդի (այսուհետ նաև՝ Խորհուրդ) բողոքը քննող հանձնաժողովը՝ գործելով Խորհրդի անունից և ուսումնասիրելով ՀՀ ֆինանսների նախարարության 17.03.2016թ. թիվ 1/73-1/9994-16 գրությամբ ներկայացված «Մուրճ» ՓԲԸ-ին (ՀՎՀՀ՝ 02800184) գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնած բողոքը (այսուհետ նաև՝ ՍՑ-ԳԲԽ-68/16 բողոք), ՀՀ ֆինանսների նախարարության 05.02.2016թ. թիվ 1/73-1/3788-16 գրությունը և կից ներկայացված փաստաթղթերի պատճենները, ինչպես նաև ուսումնասիրելով ՍՑ-ԳԲԽ-68/16 բողոքի վերաբերյալ «Գնումների աջակցման կենտրոն» ՊՈԱԿ-ի 08.11.2016թ. ներկայացրած եզրակացությունը պարզեց.

1. ՀՀ ֆինանսների նախարարության ներկայացրած փաստերը և պահանջը

ՀՀ ֆինանսների նախարարությունը (այսուհետ նաև՝ Նախարարություն), ՀՀ ԳՆ սննդամթերքի անվտանգության պետական ծառայության 07.08.2015թ. թիվ 02/42/2957-15 գրության հիման վրա, 05.02.2016թ. թիվ 1/73-1/3788-16 գրությամբ դիմել է «Գնումների աջակցման կենտրոն» ՊՈԱԿ-ին (այսուհետ՝ Կենտրոն)՝ խնդրելով ուսումնասիրել «Մուրճ» ՓԲԸ-ին (այսուհետ նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ Ցուցակ) ներառելու հիմքերը և այդպիսի

իրմքերի առկայության դեպքում ձեռնարկել անհրաժեշտ միջոցներ Ընկերությանը Ցուցակում ներառելու համար:

Վերոհիշյալ գրությամբ ՀՀ ֆինանսների նախարարությունը Կենտրոնին է ներկայացրել ՀՀ ԳՆ սննդամթերքի անվտանգության պետական ծառայության 07.08.2015թ. թիվ 02/42/2957-15 գրությունը և կից ներկայացված փաստաթղթերի պատճենները:

Կենտրոնը 12.03.2016թ. թիվ 01/04.1/917-16 գրությամբ ՀՀ ֆինանսների նախարարության 05.02.2016թ. թիվ 1/73-1/3788-16 գրության հիման վրա «Գնումների աջակցման կենտրոն» ՊՈԱԿ-ում կատարված ուսումնասիրության արդյունքում ներկայացրել է եզրակացություն, որով արձանագրել է «Մուրճ» ՓԲԸ-ի կողմից «Գնումների մասին» ՀՀ օրենքի (այսուհետ նաև՝ Օրենք) 5-րդ հոդվածի 1-ին մասի 4-րդ կետի «բ» ենթակետով նախատեսված խախտման առկայությունը:

Միաժամանակ Կենտրոնը հայտնել է, որ Օրենքի 5-րդ հոդվածի 1-ին մասի 4-րդ կետով նախատեսված՝ Ցուցակում մասնակցին ներառելու համար անհրաժեշտ է, որ նույն կետով սահմանված և մասնակցին վերագրվող խախտում թույլ տալու պահից **մեկ տարվա ընթացքում անձը մասնակցած լինի գնման որևէ գործընթացին և ներկայացրած լինի հայտ**, քանի որ օրենքի նշված նորմի համաձայն՝ մասնակիցն ընդգրկվում է նշված ցուցակում, եթե վերագրվող խախտումը կատարվել է հայտը ներկայացնելու պահին նախորդող տարվա ընթացքում:

Հաշվի առնելով վերոգրյալը՝ Կենտրոնը գտել է, որ խախտումը թույլ տալու պահից (29.07.2015թ.) հաշված մեկ տարվա ընթացքում Ընկերության կողմից հայտ ներկայացնելը հիմք կհանդիսանա ՀՀ գնումների բողոքարկման խորհրդում պաշտոնական ընթացակարգ նախաձեռնելու համար, որի արդյունքում «Մուրճ» ՓԲԸ-ն կարող է ներառվել Ցուցակում:

Սակայն, ՀՀ ֆինանսների նախարարությունը 17.03.2016թ. թիվ 1/73-1/9994-16 գրությամբ պահանջել է նախաձեռնել բողոքարկման գործընթաց՝ «Մուրճ» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով:

2. «Մուրճ» ՓԲԸ -ի ներկայացրած փաստարկները և դիրքորոշումը

«Գնումների աջակցման կենտրոն» ՊՈԱԿ-ը կարծիք ստանալու նպատակով 09.02.2016թ. թիվ 01/04.1/350-16 գրությամբ դիմել է «Մուրճ» ՓԲԸ-ին, սակայն պատասխան չի ստացվել:

3. ՀՀ ԳՆ սննդամթերքի անվտանգության պետական ծառայության ներկայացրած փաստարկները և դիրքորոշումը

ՀՀ ԳՆ սննդամթերքի անվտանգության պետական ծառայությունը 07.08.2015թ. թիվ 02/42/2957-15 գրությամբ դիմել է ՀՀ ֆինանսների նախարարությանը և հայտնել, որ «Սննդամթերքի անվտանգության ոլորտի ռիսկերի գնահատման և վերլուծության գիտական կենտրոն» ՊՈԱԿ-ի կողմից կազմակերպված «ՍԱԳԿ-15/2-ՇՀԱՊՁԲ-15/13» ծածկագրով շրջանակային համաձայնագրերի միջոցով գնում կատարելու ընթացակարգին մասնակցելու նպատակով հայտ է ներկայացրել նաև «Մուրճ» ՓԲԸ-ն:

Պատվիրատուի կողմից սահմանված կարգով ՀՀ ֆինանսների նախարարություն հարցում է ներկայացվել Ընկերության վերաբերյալ, ի պատասխան որի Նախարարությունից տրամադրվել է եզրակացություն, ըստ որի «Մուրճ» ՓԲԸ-ն հայտը ներկայացնելու օրվա դրությամբ ունեցել է ժամկետանց հարկային պարտավորություն՝ 202933 ՀՀ դրամի չափով, ինչպես նաև Ընկերության հայտը ներկայացնելուն նախորդող հաշվետու տարվա ընթացքում պարտավորությունների հաշվեկշռային արժեքը կազմել է 117296146 ՀՀ դրամ, իսկ ակտիվների հաշվեկշռային արժեքը կազմել է 40521412 ՀՀ դրամ: Հիմք ընդունելով վերոգրյալը՝ հանձնաժողովը որոշել է մերժել «Մուրճ» ՓԲԸ-ի հայտը:

4. ՍՑ-ԳԲԽ-68/16 բողոքի վերաբերյալ «Գնումների աջակցման կենտրոն» ՊՈԱԿ-ի դիրքորոշումը

«Գնումների աջակցման կենտրոն» ՊՈԱԿ-ը Խորհրդին է ներկայացրել իր 08.11.2016թ. եզրակացությունը և առաջարկել է ՀՀ ֆինանսների նախարարության 17.03.2016թ. թիվ 1/73-1/9994-16 գրությամբ ներկայացված «Մուրճ» ՓԲԸ-ին (<ՎՀՀ՝ 02800184) գնումների գործընթացին մասնակցելու իրավունք չունեցող մասնակիցների ցուցակում ընդգրկելու պաշտոնական ընթացակարգով նախաձեռնած բողոքը մերժել:

5. ՍՑ-ԳԲԽ-68/16 պաշտոնական ընթացակարգով նախաձեռնված բողոքի քննության համար էական նշանակություն ունեցող փաստերը

ՀՀ ֆինանսների նախարարության 17.03.2016թ. թիվ 1/73-1/9994-16 գրությամբ ներկայացված «Մուրճ» ՓԲԸ-ին գնումների գործընթացին մասնակցելու իրավունք չունեցող

մասնակիցների ցուցակում ներառելու պաշտոնական ընթացակարգով նախաձեռնած բողոքի քննության համար էական նշանակություն ունեն հետևյալ փաստերը՝

1. «Սննդամթերքի անվտանգության ոլորտի ռիսկերի գնահատման և վերլուծության գիտական կենտրոն» ՊՈԱԿ-ի կողմից գրասենյակային և կենցաղային կահույքի ձեռքբերման նպատակով կազմակերպվել է «ՍԱԳԿ-15/2-ՇՀԱՊՁԲ-15/13» ծածկագրով շրջանակային համաձայնագրերի միջոցով գնում կատարելու ընթացակարգ (այսուհետ՝ Ընթացակարգ), որին մասնակցելու նպատակով 29.07.2015թ. հայտ է ներկայացրել «Մուրճ» ՓԲԸ-ն:

2. Ընթացակարգին մասնակցելու նպատակով «Մուրճ» ՓԲԸ-ն 29.07.2015թ. ներկայացրած հայտի N 2 հավելվածով՝ հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությամբ հայտնել և հավաստել է, որ հայտը ներկայացնելու օրվա դրությամբ չունի ժամկետանց պարտքեր ՀՀ հարկային և պարտադիր սոցիալական ապահովության վճարների գծով, իսկ հայտի N 3.4 հավելվածով՝ ֆինանսական միջոցների մասին հայտարարության «բ» կետով հայտնել և հավաստել է, որ հայտը ներկայացնելուն նախորդող հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

3. Ընթացակարգի գնահատող հանձնաժողովը 29.07.2015թ. ժամը 11:00-ին տեղի ունեցած նիստի թիվ 2 արձանագրության 2-րդ կետով որոշել է ներկայացված հայտի հիման վրա Ընթացակարգի 7-րդ (լաբորատոր աթոտ), 8-րդ (գրասեղան), 9-րդ (աթոռներ) և 10-րդ (պահարան) չափաբաժիններով որպես 1-ին տեղ զբաղեցրած մասնակից ճանաչել «Մուրճ» ՓԲԸ-ին:

4. Պատվիրատուն, ՀՀ կառավարության 10.02.2011թ. թիվ 168-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 47-րդ կետի 1-ին ենթակետի համաձայն, տվյալների ճշտման մասին 31.07.2015թ. կատարած հարցմամբ խնդրել է Նախարարությանը տրամադրել տեղեկատվություն «Մուրճ» ՓԲԸ-ի վերաբերյալ:

5. Ի պատասխան վերոհիշյալ հարցմանը՝ ՀՀ ֆինանսների նախարարության կողմից տրամադրվել է եզրակացություն, համաձայն որի «Մուրճ» ՓԲԸ-ն **2015թ. հուլիսի 29-ի դրությամբ (հայտը ներկայացնելու օրվա դրությամբ)** Հայաստանի Հանրապետության պետական բյուջեի նկատմամբ ունեցել է ժամկետանց հարկային պարտավորություն՝ **202933 ՀՀ դրամի** չափով, միաժամանակ «Մուրճ» ՓԲԸ-ի հայտը ներկայացնելուն նախորդող հաշվետու տարվա ընթացքում պարտավորությունների

հաշվեկշռային արժեքը կազմել է՝ **117296146 ՀՀ դրամ**, իսկ ակտիվների հաշվեկշռային արժեքը կազմել է **40521412 ՀՀ դրամ**:

6. Ընթացակարգի գնահատող հանձնաժողովի կողմից 06.08.2015թ. ժամը 11:00-ին տեղի ունեցած նիստի թիվ 3 արձանագրության 5.1-ին կետով նշել է, որ համաձայն Նախարարության կողմից տրամադրված եզրակացության՝ «Մուրճ» ՓԲԸ-ն ունի ՀՀ պետական բյուջեի նկատմամբ ժամկետանց հարկային պարտավորություններ, իսկ Ընկերության հայտը ներկայացնելուն նախորդող հաշվետու տարվա ընթացքում պարտավորությունների հաշվեկշռային արժեքը գերազանցել է ակտիվների հաշվեկշռային արժեքը, ուստի 6.1 կետով որոշում է կայացվել մերժել «Մուրճ» ՓԲԸ-ի հայտը:

7. Կենտրոնը ՀՀ ֆինանսների նախարարությանն ուղղված 12.03.2016թ. թիվ 01/04.1/917-16 գրությամբ արձանագրել է «Մուրճ» ՓԲԸ-ի կողմից «Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «բ» ենթակետով նախատեսված խախտման առկայությունը, և միաժամանակ հայտնել, որ գործում առկա չէ որևէ տեղեկատվություն «Մուրճ» ՓԲԸ-ի կողմից խախտումը թույլ տալու օրվանից՝ **29.07.2015թ.-ից** հաշված մեկ տարվա ընթացքում հայտ ներկայացնելու վերաբերյալ, ուստի Կենտրոնը գտել է, որ ՀՀ ֆինանսների նախարարության 05.02.2016թ. թիվ 1/73-1/3788-16 գրությամբ ներկայացված «Մուրճ» ՓԲԸ-ին Ցուցակում ներառելու հիմքեր առկա չեն:

8. Ի պատասխան Կենտրոնի 12.03.2016թ. թիվ 01/04.1/917-16 գրության՝ ՀՀ ֆինանսների նախարարությունը 17.03.2016թ. թիվ 1/73-1/9994-16 գրությամբ պահանջել է նախաձեռնել բողոքարկման գործընթաց՝ «Մուրճ» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով:

9. Համաձայն Կենտրոնի գնումների կազմակերպման և վերլուծության վարչության 25.10.2016թ. թիվ 03.1/[8279]-16 ծառայողական գրության՝ «Մուրճ» ՓԲԸ-ն «Գնումների աջակցման կենտրոն» ՊՈԱԿ-ում շրջանակային համաձայնագրերով գնում կատարելու ընթացակարգերին որպես հնարավոր մասնակից գրանցված չէ:

6. Խորհրդի հիմնավորումները և եզրահանգումը

Քննելով ՍՅ-ԳԲԽ-68/16 բողոքը, Խորհուրդը գտնում է, որ այն ենթակա է մերժման հետևյալ հիմնավորմամբ.

«Գնումների մասին» ՀՀ օրենքի (այսուհետ նաև՝ Օրենք) 5-րդ հոդվածի 1-ին մասի 2-րդ կետի համաձայն՝ **գնումների ընթացակարգերին մասնակցելու իրավունք չունեն**

անձինք, որոնք ունեն ժամկետանց պարտքեր Հայաստանի Հանրապետության հարկային և պարտադիր սոցիալական ապահովության վճարների գծով:

Նույն հոդվածի 1-ին մասի 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում գնման գործընթացի շրջանակում **ներկայացրել է կեղծ տվյալ:**

Օրենքի 48-րդ հոդվածի 6-րդ մասի 7-րդ կետի համաձայն՝ ՀՀ գնումների բողոքարկման խորհուրդն իրավունք ունի որոշում կայացնելու մասնակցին գնումների գործընթացին մասնակցության իրավունք չունեցող մասնակիցների ցուցակում ներառելու համար:

Կարգի 35-րդ կետի 1-ին ենթակետի «բ» պարբերության համաձայն՝ մասնակիցը հայտով ներկայացնում է՝ իր կողմից հաստատված հայտարարություն՝ օրենքով նախատեսված մասնակցության իրավունքի և հրավերով սահմանված որակավորման չափանիշներին իր համապատասխանության մասին:

Կարգի 47-րդ կետի 1-ին ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային եղանակով Հայաստանի Հանրապետության ֆինանսների նախարարություն հարցում է ներկայացնում առաջին և հաջորդաբար տեղ զբաղեցրած մասնակիցների՝ Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորությունների, ինչպես նաև նույն կարգի 67-րդ կետով նախատեսված որակավորման պահանջի առկայության վերաբերյալ՝ ներկայացնելով հարկ վճարողի հաշվառման համարը:

Կարգի 48-րդ կետի համաձայն՝ եթե Կարգի 47-րդ կետի 1-ին ենթակետով նախատեսված հարցմանն ի պատասխան տրամադրված եզրակացության արդյունքում մասնակցի ներկայացրած հայտարարությունները որակվում են իրականությանը չհամապատասխանող, ապա՝

1) հայտերի գնահատման արդյունքների հրապարակման նիստում հանձնաժողովի որոշմամբ տվյալ մասնակցի հայտը մերժվում է, և

2) այդ մասնակցի տվյալները գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով ի հայտ եկած հանգամանքների մասին տեղեկությունները պատվիրատուի կողմից ուղարկվում են Հայաստանի Հանրապետության ֆինանսների նախարարություն՝ դրանց ի հայտ գալու օրվան հաջորդող երեք աշխատանքային օրվա ընթացքում:

Կարգի 67-րդ կետի 1-ին ենթակետի «բ» պարբերության համաձայն՝ մասնակիցների՝ Օրենքի 5-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝

1) հրավերով պահանջվում է, որ Հայաստանի Հանրապետության ռեզիդենտ հանդիսացող մասնակիցն իր հայտով ներկայացնում է հայտարարություն այն մասին, որ իր կողմից **հայտը ներկայացվելուն նախորդող՝**

բ. հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը.

Կարգի 124-րդ կետի համաձայն՝ Հայաստանի Հանրապետության ֆինանսների նախարարությունը քննարկում է կենտրոնի կողմից ներկայացված գնումների գործընթացին մասնակցելու իրավունք չունեցող մասնակիցների ցուցակում տվյալ մասնակցին ներառելու հիմքերի բացակայության վերաբերյալ տրամադրված եզրակացությունը, համաձայնության դեպքում՝

1) դադարեցնում է գնումների գործընթացին մասնակցելու իրավունք չունեցող մասնակիցների ցուցակում տվյալ մասնակցին ներառելու նպատակով նախաձեռնած գործընթացը և տեղեկացնում դիմող պատվիրատուին.

2) հակառակ դեպքում կենտրոն է ներկայացնում Հայաստանի Հանրապետության ֆինանսների նախարարության առարկությունները և *պահանջում նախաձեռնել գնումների գործընթացին մասնակցելու իրավունք չունեցող մասնակիցների ցուցակում տվյալ մասնակցին ներառելու ընթացակարգը:*

Այսպիսով, «Սննդամթերքի անվտանգության ոլորտի ռիսկերի գնահատման և վերլուծության գիտական կենտրոն» ՊՈԱԿ-ի կողմից գրասենյակային և կենցաղային կահույքի ձեռքբերման նպատակով կազմակերպված «ՍԱԳԿ-15/2-ՇՀԱՊԶԲ-15/13» ծածկագրով շրջանակային համաձայնագրերի միջոցով գնում կատարելու ընթացակարգին մասնակցելու նպատակով «Մուրճ» ՓԲԸ-ն **29.07.2015թ.** ներկայացրած հայտի N 2 հավելվածով՝ հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությամբ հայտնել և հավաստել է, որ հայտը ներկայացնելու օրվա դրությամբ չունի ժամկետանց պարտքեր ՀՀ հարկային և պարտադիր սոցիալական ապահովության վճարների գծով, իսկ հայտի N 3.4 հավելվածով՝ ֆինանսական միջոցների մասին հայտարարության «բ» կետով հայտնել և հավաստել է, որ հայտը ներկայացնելուն նախորդող հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

Պատվիրատուն, Կարգի 47-րդ կետի 1-ին ենթակետի համաձայն, տվյալների ճշտման մասին կատարած հարցմամբ խնդրել է Նախարարությանը տրամադրել տեղեկատվություն «Մուրճ» ՓԲԸ-ի վերաբերյալ, ի պատասխան որի՝ ՀՀ ֆինանսների նախարարության կողմից Պատվիրատուին տրամադրվել է եզրակացություն, համաձայն որի «Մուրճ» ՓԲԸ-ն **2015թ. հուլիսի 29-ի դրությամբ (հայտը ներկայացնելու օրվա դրությամբ) ունեցել է ժամկետանց հարկային պարտավորություն՝ 202933 ՀՀ դրամի չափով, ինչպես նաև Ընկերության հայտը ներկայացնելուն նախորդող հաշվետու տարվա ընթացքում պարտավորությունների հաշվեկշռային արժեքը (117296146 ՀՀ դրամ) գերազանցել է ակտիվների հաշվեկշռային արժեքը (40521412 ՀՀ դրամ):**

Ելնելով վերոգրյալից՝ Խորհուրդը գտնում է, որ «Մուրճ» ՓԲԸ-ի կողմից 29.07.2015թ. ներկայացրած հայտի N 2 հավելվածով և N 3.4 հավելվածի «բ» կետով արված հայտարարությունները հանդիսանում են «Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «բ» ենթակետով նախատեսված գնման գործընթացի շրջանակում կեղծ տվյալի ներկայացում:

Օրենքի 5-րդ հոդվածի 1-ին մասի 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե **հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:**

Այսպիսով, Օրենքի 5-րդ հոդվածի 1-ին մասի 4-րդ կետով նախատեսված՝ գնումների գործընթացին մասնակցելու իրավունք չունեցող մասնակիցների ցուցակում մասնակցին ներառելու համար **պարտադիր և միաժամանակյա առկա հիմքերն են՝**

- նույն կետի «բ» ենթակետով նախատեսված և մասնակցին վերագրվող խախտման առկայությունը,
- խախտումը թույլ տալու պահից մեկ տարվա ընթացքում մասնակցի կողմից գնման գործընթացին մասնակցելու համար հայտ ներկայացրած լինելու հանգամանքը:

Ելնելով վերոգրյալից, Խորհուրդն արձանագրում է, որ «Մուրճ» ՓԲԸ-ի վերաբերյալ դեռևս առկա է Ցուցակում ներառելու միայն մեկ հիմքը, այն է՝ **Օրենքի 5-րդ հոդվածի 1-ին մասի 4-րդ կետի «բ» ենթակետով նախատեսված և վերջինիս վերագրվող խախտման առկայությունը**, սակայն Ընկերությանը Ցուցակում ներառելու մասին որոշումը կարող է կայացվել միայն երկրորդ պարտադիր հիմքի՝ **խախտումը թույլ տալու պահից մեկ տարվա ընթացքում մասնակցի կողմից հայտ ներկայացնելու հանգամանքի** ի հայտ գալու պայմաններում: Մինչդեռ, մինչև վերոհիշյալ եզրակացությունը ՍՅ-ԳԲԽ-68/16 բողոքը քննող հանձնաժողովին տրամադրելը՝ չկա տեղեկատվություն Ընկերությանը

վերագրվող խախտում թույլ տալու պահից (29.07.2015թ.) մեկ տարվա ընթացքում գնման որևէ գործընթացին հայտ ներկայացրած լինելու վերաբերյալ:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

ՀՀ ֆինանսների նախարարության 17.03.2016թ. թիվ 1/73-1/9994-16 գրությամբ ներկայացված «Մուրճ» ՓԲԸ-ին (ՀՎՀՀ՝ 02800184) գնումների գործընթացին մասնակցելու իրավունք չունեցող մասնակիցների ցուցակում ընդգրկելու պաշտոնական ընթացակարգով նախաձեռնած բողոքը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի կայացրած որոշումը կարող է բողոքարկվել դատական կարգով:

Բողոքը քննող հանձնաժողով՝

Նախագահ՝

Գոռ Գրիգորյան

Անդամ՝

Մնացականյան Հասմիկ